

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савет*

**Zaključak o odbacivanju Prijave koncentracije privrednih subjekata Coca-Cola HBC B-H i  
Argeta d.o.o. Sarajevo**

**Sarajevo  
decembar, 2013. godine**



Broj: 02-26-1-29- 12 -II/13  
Sarajevo, 27.12. 2013.godine

Na osnovu člana 25. stav (1) tačka e), člana 42. stav (2), a u vezi sa članovima 12. i 14. Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po Prijavi koncentracije privrednih subjekata Coca-Cola HBC B-H d.o.o. Sarajevo, Mostarsko raskršće bb, Hadžići i Argeta d.o.o. Sarajevo, društvo sa ograničenom odgovornošću, Donji Hadžići 138, 71000 Sarajevo, podnesenoj putem opunomoćenika advokata Branka Marića i Ezmane Turković, Marić & Co Advokatsko društvo d.o.o., Mehmeda Spahe 26, 71000 Sarajevo, zaprimljenoj dana 25.10.2013. godine pod brojem: 02-26-1-29-II/13, Konkurencijsko vijeće Bosne i Hercegovine, na 77. (sedamdesetsedmoj) sjednici održanoj dana 27.12.2013. godine, donijelo je

### **ZAKLJUČAK**

1. Odbacuje se Prijava koncentracije privrednog subjekta Coca-Cola HBC B-H d.o.o. Sarajevo, Mostarsko raskršće bb, Hadžići i privrednog subjekta Argeta d.o.o. Sarajevo, društvo sa ograničenom odgovornošću, Donji Hadžići 138, 71000 Sarajevo, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Ovaj Zaključak bit će objavljen u „Službenom glasniku BiH“, službenim glasilima entiteta i Brčko distrikta Bosne i Hercegovine.

### **Obrazloženje**

Konkurencijsko vijeće Bosne i Hercegovine (dalje u tekstu: Konkurencijsko vijeće) dana 25.10.2013. godine pod brojem: 02-26-1-29-II/13, je zaprimilo Prijavu koncentracije (dalje u tekstu: Prijava) od strane privrednih subjekata Coca-Cola HBC B-H d.o.o. Sarajevo, Mostarsko raskršće bb, Hadžići (dalje u tekstu: Coca-Cola HBC B-H) i Argeta d.o.o. Sarajevo, društvo sa ograničenom odgovornošću, Donji Hadžići 138, 71000 Sarajevo (dalje u tekstu: Argeta Sarajevo ili označeni zajedno kao: Podnosioci prijave) podnesenu putem opunomoćenika advokata Branka Marića i Ezmane Turković, Marić & Co Advokatsko društvo d.o.o., Mehmeda Spahe 26, 71000 Sarajevo, kojom su Podnosioci prijave, stekli većinski udio u privrednom subjektu Ekopak RS - društvo za postupanje sa ambalažnim otpadom d.o.o., Slatinska 8, 78000 Banja Luka (dalje u tekstu: Ekopak RS).

Konkurencijsko vijeće je uvidom u dostavljenu dokumentaciju utvrdilo da Prijava nije kompletna te je zatražilo dopunu podataka aktom broj: 02-26-1-29-1-II/13 od 22.11.2013. godine i aktom broj: 02-26-1-29-4-II/13 od 11.12.2013. godine.

Podnosioci prijave su predmetnu Prijavu dopunili podneskom broj: 02-26-1-29-2-II/13 od dana 29.11.2013. godine i podneskom broj: 02-26-1-29-5-II/13 od 16.12.2013. godine.

Konkurencijsko vijeće je također zatražilo podatke i od trećih lica, odnosno, akt broj: 02-26-1-29-6-II/13 od 19.12.2013. godine upućen je Fondu za zaštitu životne sredine i energetske efikasnosti i akt

broj: 02-26-1-29-7-II/13 od 19.12.2013. godine upućen Fondu za zaštitu okoliša Federacije Bosne i Hercegovine.

Traženi podaci dostavljeni su aktom broj: 02-26-1-29-10-II/13 od 26.12.2013. godine i aktom broj: 02-26-1-29-11-II/13 od 27.12.2013. godine.

Po prijemu dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona o konkurenciji (dalje u tekstu: Zakon), dana 24.12.2013. godine, pod brojem: 02-26-1-29-8-II/13.

Podnosioci prijave su u skladu s članom 30. stav (2) Zakona u istoj naveli da Prijavu nisu podnijeli niti imaju namjeru podnositi ovlaštenim tijelima za ocjenu koncentracije izvan teritorije Bosne i Hercegovine.

Konkurencijsko vijeće u postupku ocjene dopuštenosti predmetne koncentracije je utvrdilo slijedeće činjenice:

Prijava koncentracije je podnesena u zakonom propisanom roku, u smislu člana 16. stav (1) Zakona o konkurenciji.

Uvidom u dostavljenu dokumentaciju utvrđeno je slijedeće:

## **1. Učesnici koncentracije**

Učesnici koncentracije su privredni subjekti Coca-Cola HBC B-H d.o.o. Sarajevo, Mostarsko raskršće bb, Hadžići, Argeta d.o.o. Sarajevo, društvo sa ograničenom odgovornošću, Donji Hadžići 138, 71000 Sarajevo i privredni subjekt EKOPAK – društvo za postupanje sa ambalažnim otpadom d.o.o Sarajevo, Zmaja od Bosne 7-7a, 71000 Sarajevo.

### **1.1. Privredni subjekt Coca-Cola HBC B-H**

Privredni subjekt Coca-Cola HBC B-H d.o.o. Sarajevo, Mostarsko raskršće bb, Hadžići, registovan je u Općinskom sudu u Sarajevu pod brojem 65-01-0806-09 (stari broj: 1-17278), sa ugovorenim osnovnim kapitalom od (..)\*<sup>1</sup> KM i u (..)\*% je vlasništvu privrednog subjekta CC Beverages Holding II B.V., Naritaweg 165, 1043 BW Amsterdam, Holandija.

Privredni subjekt Coca-Cola HBC B-H, kao dio grupe Coca-Cola Hellenic, djeluje na tržištu proizvodnje i prodaje bezalkoholnih napitaka u Bosni i Hercegovini od 1996. godine. Privredni subjekt Coca-Cola HBC B-H kao ovlaštena punionica The Coca-Cola Company proizvodi i distribuira asortiman robnih marki: Coca-Cola, Coca-Cola Zero, Fanta, Sprite, Cappy, Cappy Tempo, Next i Burn, te domaću robnu marku Olimpija.

Privredni subjekt Coca-Cola HBC B-H posjeduje (..)\*% udjela u privrednom subjektu EKOPAK.

### **1.2. Privredni subjekt Argeta Sarajevo**

Privredni subjekt Argeta d.o.o. Sarajevo, društvo sa ograničenom odgovornošću, Donji Hadžići 138, 71000 Sarajevo upisan je u sudski registar Općinskog suda u Sarajevu pod brojem 65-01-0595-12, sa osnovnim kapitalom od (..)\* KM i u (..)\*% je vlasništvu privrednog subjekta Droga Kolinska, Živilska industrija d.d Ljubljana, Kolinska cesta, Ljubljana, Republika Slovenija.

---

<sup>1</sup> (..)\* - Podaci predstavljaju poslovnu tajnu

Privredni subjekt Argeta Sarajevo djeluje na tržištu proizvodnje i prodaje konzervirane hrane u Bosni i Hercegovini.

Privredni subjekt Argeta Sarajevo nema povezana društva u Bosni i Hercegovini.

### **1.3. Privredni subjekt EKOPAK**

Privredni subjekat EKOPAK – Društvo za postupanje sa ambalažnim otpadom d.o.o Sarajevo, Zmaja od Bosne 7-7a, Objekat O3, 71000 Sarajevo, upisan je u Općinskom sudu u Sarajevu pod brojem: 65-01-0397-11, JIB: 4201654990000.

Osnivači privrednog subjekta EKOPAK su privredni subjekti:

- ARGETA d.o.o. Sarajevo, Donji Hadžići 138, 71000 Sarajevo,
- ORBICO d.o.o. Sarajevo, Lužansko polje 7, 71000 Sarajevo,
- BIHAĆKA PIVOVARA d.d. Bihać, Vinička bb, 77000 Bihać,
- VIOLETA d.o.o. Tomislavgrad, Kolo bb, 80240 Kolo,
- BANJALUČKA PIVARA a.d. Banja Luka, Slatinska 8, 78000 Banja Luka,
- Coca-Cola HBC B-H d.o.o. Sarajevo, Mostarsko raskršće bb, 71240 Hadžići,
- BIMAL d.d. Brčko, Bijeljinska 9, 76100 Brčko distrikt.

Navedeni osnivači imaju isti udio u privrednom subjektu EKOPAK koji iznosi (..)\*2% odnosno (..)\* KM osnovnog kapitala.

Pretežne registrovane djelatnosti privrednog subjekta EKOPAK su upravljanje ambalažom i ambalažnim otpadom.

Privredni subjekt EKOPAK (..)\*% je vlasnik i osnivač privrednog subjekta Ekopak RS.

### **1.4. Privredni subjekt Ekopak RS – predmet koncentracije**

Privredni subjekt Ekopak RS – Društvo za postupanje sa ambalažnim otpadom d.o.o, Slatinska 8, Banja Luka upisan je u Okružnom privrednom sudu u Banja Luci pod brojem: 57-01-0012-13, JIB: 4403532080004.

Osnivač i vlasnik privrednog subjekta Ekopak RS jeste privredni subjekt EKOPAK sa uplaćenim kapitalom od (..)\* KM.

Pretežne registrovane djelatnosti privrednog subjekta Ekopak RS su upravljanje ambalažom i ambalažnim otpadom.

Privredni subjekt Ekopak RS nema povezana društva u Bosni i Hercegovini.

## **2. Pravni osnov i pravni oblik koncentracije**

Kao pravni osnov ove koncentracije Podnosioci prijave su dostavili „Ugovor o prenosu udjela u društvu Ekopak RS – Društvo za postupanje sa ambalažnim otpadom d.o.o.“ (u daljem tekstu: Ugovor) potpisan dana 17.10.2013. godine u Sarajevu od strane privrednih subjekta Coca-Cola HBC B-H, Argeta Sarajevo i EKOPAK.

---

<sup>2</sup> (..)\* - Podaci predstavljaju poslovnu tajnu

Uvidom u dostavljeni Ugovor utvrđeno je da privredni subjekt EKOPAK kao osnivač i vlasnik ((..)\*<sup>3</sup>%) privrednog subjekta Ekopak RS prenosi na druga dva privredna subjekta – Coca-Cola HBC BH i Argeta Sarajevo po (..)\*% udjela u osnovnom kapitalu privrednog subjekta Ekopak RS.

U skladu sa naprijed navedenim, a na osnovu člana 12. stav (1) tačka b) pod 1. Zakona, pravni oblik koncentracije je sticanje kontrole jednog ili više privrednih subjekata (privredni subjekti Coca-Cola HBC B-H i Argeta Sarajevo) nad drugim privrednim subjektom (privrednim subjektom Ekopak RS) kupovinom većine udjela osnovnog kapitala.

### 3. Pravni okvir ocjene koncentracije /transakcije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta („Službeni glasnik BiH“, br. 18/06 i 34/10), te Odluke o načinu podnošenja prijave i kriterijima za ocjenu koncentracije privrednih subjekata („Službeni glasnik BiH“, broj 34/10).

### 4. Obaveza prijave koncentracije

Obaveza prijave koncentracije privrednih subjekata, u smislu člana 14. stav (1) tačke a) i b) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu iznose 100.000.000,00 KM, po završnom računu u godini koja je prethodila predmetnoj koncentraciji, i da ukupan prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM, ili ako je zajednički tržišni udio učesnika koncentracije na relevantnom tržištu veći od 40,0%.

Ukupni ostvareni godišnji prihodi privrednih subjekata učesnika predmetne koncentracije na dan 31.12.2012. godine iznosili su:

Tabela 1.

Ukupni prihod (KM)	Coca-Cola HBC B-H	Argeta Sarajevo	EKOPAK	Ekopak RS
<b>Bosna i Hercegovina</b>	(..)*	(..)*	(..)*	-
<b>Svijet</b>	(..)*	(..)*	-	-

Izvor: podaci iz Prijave

Privredni subjekt Ekopak RS u 2012. godini nije ostvarivao prihode dok je prihod od prodaje učinaka privrednog subjekta EKOPAK iznosio (..)\* KM od čega je (..)\* KM prihod povezanim pravnim licima.

### 5. Relevantno tržište koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu, relevantno tržište obuhvata sve proizvode i/ili usluge koje potrošači i/ili korisnici smatraju međusobno

<sup>3</sup> (..)\* - Podaci predstavljaju poslovnu tajnu

zamjenjivim, pod prihvatljivim uslovima, imajući u vidu posebno njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Prema članu 5. Odluke o utvrđivanju relevantnog tržišta, relevantno tržište u geografskom smislu obuhvata cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Uzimajući u obzir pretežne registrovane djelatnosti privrednog subjekta Ekopak RS koji je u ovom slučaju predmet koncentracije, relevantno tržište proizvoda i/ili usluga u konkretnom slučaju je tržište upravljanja ambalažnim otpadom.

Obzirom da privredni subjekti, učesnici koncentracije djeluju na cijeloj teritoriji Bosne i Hercegovine, pod relevantnim geografskim tržištem smatrat će se tržište Bosne i Hercegovine.

Slijedom navedenog, pod relevantnim tržištem predmetne koncentracije smatrat će se tržište upravljanja ambalažnim otpadom na teritoriji Bosne i Hercegovine.

### 5.1. Analiza relevantnog tržišta

Obzirom da u Bosni i Hercegovini ne postoje precizne analize o količini ambalaže plasirane na tržištu, Podnosioci prijave došli su do procjene količine ambalaže u Bosni i Hercegovini uzevši u obzir dva parametra na osnovu kojih se i radi analiza a to su: broj stanovnika i visina nacionalnog dohotka, odnosno kupovne moći stanovništva, koji kupuju proizvode u ambalaži.

Tabela 2.

R.br.	Zemlja	GDP nominalni	GDP kupovna moć stanovništva	Broj stanovnika	Ambalaža po stanovniku (kg)
1.	Slovenija	28.396	27.589	2.000.000	160
2.	Bosna i Hercegovina	4.461	9.597	4.000.000	72

Izvor: podaci iz Prijave; komparativna analiza podataka za Sloveniju i Bosnu i Hercegovinu

Broj stanovnika u Bosni i Hercegovini prema posljednjem popisu stanovništva iznosi 3.791.622, i ako svaki stanovnik godišnje generiše 72 kg ambalaže dolazi se do podatka da se godišnje na tržište Bosne i Hercegovine plasira 272.996 tona ambalaže.

Prema podacima Fonda za zaštitu okoliša Federacije Bosne i Hercegovine, ovoj instituciji je prijavljeno 18.552 tona i od ove količine izdata su Rješenja o plaćanju naknada za 16.110 tona, jer su 2.442 tone raportirane od strane malih obveznika koji prema Pravilniku nemaju obavezu plaćanja.

Fond za zaštitu životne sredine i energetska efikasnost Republike Srpske potvrdio je da u Republici Srpskoj ne postoji ovlašteni operater sistema, te da su ukupne prijavljene količine ambalaže plasirane na teritoriji Republike Srpske u toku 2012. godine iznosile 26.836 tona.

Od (..)\*<sup>4</sup> potpisanih ugovora sa proizvođačima, uvoznocima, puniocima, distributerima i trgovcima privrenom subjektu EKOPAK je u 2012. godini prijavljeno ukupno (..)\* tona ambalaže stavljene na teritoriju Federacije Bosne i Hercegovine.

<sup>4</sup> (..)\* - Podaci predstavljaju poslovnu tajnu

Polazeći od procjene da se na teritoriji Federacije Bosne i Hercegovine plasira 2/3 od ukupne ambalaže tržišta Bosne i Hercegovine Podnosioci prijave dolaze do procjene da se na teritoriji Federacije Bosne i Hercegovine godišnje plasira oko 190.000 tona ambalaže što bi onda značilo da tržišni udio privrednog subjekta EKOPAK na tržištu upravljanja ambalažnim otpadom iznosi oko 25,0%.

## **6. Ocjena koncentracije**

Prema podacima iz Prijave (Tabela 1.) učesnici koncentracije nisu ispunili uslov ukupnog godišnjeg prihoda, u smislu člana 14. stav (1) tačka b) Zakona.

Također, u smislu naprijed navedenog, učesnici koncentracije nisu ispunili ni uslov da je njihov zajednički tržišni udio na relevantnom tržištu veći od 40,0% obzirom da privredni subjekti Coca-Cola HBC B-H i Argeta Sarajevo nisu prisutni na naprijed definisanom relevantnom tržištu.

Na osnovu naprijed navedenog, utvrđeno je da privredni subjekti Coca-Cola HBC B-H i Argeta Sarajevo nisu bili obavezni podnijeti Prijavu koncentracije u smislu člana 14. Zakona, te je odlučeno kao u dispozitivu.

## **7. Administrativna taksa**

Podnosilac prijave na ovaj zaključak, u skladu sa članom 2. Tarifni broj 108. tačka c) Odluke o administrativnim taksama u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) je dužan platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## **8. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednik**

**Gordan Raspudić**